

5. Someter ó Pleno as propostas de nomeamento dos maxistrados do Tribunal Supremo a que se refire o artigo 127.4) desta lei.

6. Propo-lo nomeamento de relatorios para prepara-la resolución ou despacho dun asunto.

7. Autorizar coa súa sinatura os acordos do Pleno e da Comisión Permanente.

8. Exerce-la superior dirección das actividades dos órganos técnicos do Consello.

9. As demais previstas na lei.”

2. Modifícase o artigo 127 da Lei orgánica 6/1985, do 1 de xullo, do Poder Xudicial, que terá a seguinte redacción:

«127. Será da competencia do Pleno do Consello Xeral do Poder Xudicial:

1. A proposta de nomeamento por maioría de 3/5 do presidente do Tribunal Supremo e do Consello Xeral do Poder Xudicial e do vicepresidente deste último.

2. A proposta de nomeamento de membros do Tribunal Constitucional, que terá que ser adoptada por maioría de 3/5 dos seus membros.

3. A proposta de nomeamento de presidentes de sala e maxistrados do Tribunal Supremo e calquera outro discrecional.

4. A proposta de nomeamento do maxistrado da Sala Segunda do Penal ou Terceira do Contencioso-Administrativo, do Tribunal Supremo, competente para coñecer da autorización das actividades do Centro Nacional de Intelixencia que afecten os dereitos fundamentais recoñecidos no artigo 18.2 e 3 da Constitución, así como a proposta de nomeamento do maxistrado das ditas salas do Tribunal Supremo que o substitúa en caso de vacancia, ausencia ou imposibilidade.

5. A proposta de nomeamento de presidente dos Tribunais Superiores de Xustiza das comunidades autónomas.

6. Cumpra-la audiencia prevista no artigo 124.4 da Constitución sobre nomeamento do fiscal xeral do Estado.

7. Resolve-los recursos de alzada interpostos contra os acordos da Comisión Permanente, da Comisión Disciplinaria e das salas de goberno dos Tribunais Superiores de Xustiza e dos órganos de goberno dos tribunais e xulgados.

8. Resolve-los expedientes de rehabilitación instruídos pola Comisión Disciplinaria.

9. Realiza-los informes previstos na lei e exerce-la potestade regulamentaria atribuída pola lei ó Consello Xeral do Poder Xudicial.

10. Acordar, nos casos legalmente establecidos, a separación e xubilación dos xuíces e maxistrados nos supostos non previstos no artigo 131.3.

11. Elixir e nomea-los vocais compoñentes das comisións e delegacións.

12. Aproba-la memoria anual que con motivo da apertura do ano xudicial lerá o seu presidente sobre o estado da Administración de xustiza.

13. Elabora-lo orzamento do Consello Xeral do Poder Xudicial que se integrará nos xerais do Estado, nunha sección independente.

14. Dirixi-la execución do orzamento do Consello e controla-lo seu cumprimento.

15. Calquera outra función que lle corresponda ó Consello Xeral do Poder Xudicial e non se atope expresamente atribuída a outros órganos del.”

3. Modifícase o artigo 135 da Lei orgánica 6/1985, do 1 de xullo, do Poder Xudicial, que terá a seguinte redacción:

«135. Corresponderalle á Comisión de Cualificación informar, en todo caso, sobre os nomeamentos da competencia do Pleno, agás o nomeamento do maxistrado do Tribunal Supremo previsto no artigo 127.4) desta lei.»

4. Engádesse un novo artigo 342 bis á Lei orgánica 6/1985, do 1 de xullo, do Poder Xudicial, que terá a seguinte redacción:

«Artigo 342 bis.

O maxistrado do Tribunal Supremo competente para coñecer da autorización das actividades do Centro Nacional de Intelixencia que afecten os dereitos fundamentais recoñecidos no artigo 18.2 e 3 da Constitución nomearase por un período de cinco anos, por proposta do Consello Xeral do Poder Xudicial, entre maxistrados do dito tribunal que contén con tres anos de servicios na categoría.»

Disposición derradeira única. *Entrada en vigor.*

Esta lei orgánica entrará en vigor o mesmo día da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumpran e fagan cumprir esta lei orgánica.

Madrid, 6 de maio de 2002.

JUAN CARLOS R.

O presidente do Goberno,  
JOSÉ MARÍA AZNAR LÓPEZ

**8628** *LEI 11/2002, do 6 de maio, reguladora do Centro Nacional de Intelixencia. («BOE» 109, do 7-5-2002.)*

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.

#### EXPOSICIÓN DE MOTIVOS

A sociedade española demanda uns servicios de intelixencia eficaces, especializados e modernos, capaces de afrontar-los novos retos do actual escenario nacional e internacional, reixidos polos principios de control e pleno sometemento ó ordenamento xurídico.

A actual regulación do Centro Superior de Información da Defensa está contida nunha pluralidade de disposicións, ningunha delas de rango legal, que supuxeron un esforzo de adecuación das súas estruturas e funcionamento ós novos requirimentos da sociedade e do Estado. Sen embargo, carecen dunha regulación unitaria e sistemática e co rango legal apropiado á luz da Constitución.

Só o estatuto do seu persoal foi deseñado por unha norma con rango de lei formal e desenvolvido regulamentariamente.

Esta situación fai necesario abordar unha nova regulación dos servicios de intelixencia mediante unha norma con rango de lei, na que se recollan dunha forma unitaria e sistemática a natureza, obxectivos, principios, funcións, aspectos substanciais da súa organización e réxime xurí-

dico-administrativo, así como os controis parlamentario e xudicial, constituíndo estes a esencia do seu funcionamento eficaz e transparente.

Esta lei, inspirándose no modelo dos países do noso contorno político e cultural, pretende, xa que logo, dota-los servicios de intelixencia dos instrumentos precisos para que poidan cumprilos obxectivos que lles asignen as disposicións legais e regulamentarias.

Créase o Centro Nacional de Intelixencia, que substitúe o Centro Superior de Información da Defensa e, dada a natureza e misións que vai ter encomendadas, se configura como organismo público especial dos previstos na disposición adicional décima da Lei 6/1997, do 14 de abril, de organización e funcionamento da Administración xeral do Estado. Desta forma, contará coa necesaria autonomía funcional para o cumprimento das súas misións, polo que terá un réxime específico orzamentario, de contratación e de persoal.

Respecto deste último, esta lei contén a habilitación necesaria para que o Goberno poida aprobar un estatuto, único e uniforme, para todo o persoal que preste servicios no Centro Nacional de Intelixencia, xa que, en caso contrario, o dito persoal rexeríase por lexislacións distintas dependendo da súa condición e relación coa Administración.

A principal misión do Centro Nacional de Intelixencia será a de lle proporcionar ó Goberno a información e intelixencia necesarias para prever e evitar calquera risco ou ameaza que afecte a independencia e integridade de España, os intereses nacionais e a estabilidade do Estado de dereito e as súas institucións.

O centro continuará adscrito ó Ministerio de Defensa. Esta adscrición adquire un novo sentido á luz dos novos retos que para os servicios de intelixencia se derivan dos chamados riscos emerxentes, que esta lei afronta ó defini-las funcións do centro. Os seus obxectivos, definidos polo Goberno, serán aprobados anualmente polo Consello de Ministros e plasmaranse na Directiva de intelixencia.

O Centro Nacional de Intelixencia funcionará baixo o principio de coordinación cos demais servicios de información do Estado español. Para estes efectos, créase a Comisión Delegada do Goberno para Asuntos de Intelixencia, presidida polo vicepresidente do Goberno que designe o seu presidente e integrada polo ministro de Asuntos Exteriores, o ministro de Defensa, o ministro do Interior, o ministro de Economía, o secretario xeral da Presidencia, o secretario de Estado de Seguridade e o secretario de Estado director do Centro Nacional de Intelixencia.

Por primeira vez, unha lei prevé de forma específica o principio do control parlamentario das actividades do Centro Nacional de Intelixencia. Esta lei, dentro do respecto á autonomía parlamentaria, prevé que sexa a comisión que controla os créditos destinados a gastos reservados a que efectúe o control das actividades do centro, coñecendo os obxectivos que fosen aprobados polo Goberno e un informe anual sobre o grao de cumprimento deles e das súas actividades. De acordo coa normativa parlamentaria, os membros desta comisión son tamén os que coñecen dos segredos oficiais.

O proxecto inclúe aqueles aspectos da regulación do Centro Nacional de Intelixencia que, conforme a Constitución, non están reservados a lei orgánica. É na lei orgánica complementaria da presente lei na que se aborda o control previo das actividades do Centro Nacional de Intelixencia.

Ámbalas leis deben ser interpretadas conxunta e sistematicamente, xa que a adopción das medidas que requiran autorización xudicial previa deberá xustificarse no cumprimento das funcións que esta lei lle asigna ó Centro Nacional de Intelixencia.

## CAPÍTULO I

### Disposicións xerais

#### Artigo 1. *O Centro Nacional de Intelixencia.*

O Centro Nacional de Intelixencia é o organismo público responsable de lle facilitar ó presidente do Goberno e ó Goberno da nación as informacións, análises, estudos ou propostas que permitan prever e evitar calquera perigo, ameaza ou agresión contra a independencia ou integridade territorial de España, os intereses nacionais e a estabilidade do Estado de dereito e as súas institucións.

#### Artigo 2. *Principios.*

1. O Centro Nacional de Intelixencia rexerese polo principio de sometemento ó ordenamento xurídico e levará a cabo as súas actividades específicas no marco das habilitacións expresamente establecidas nesta lei e na Lei orgánica 2/2002, do 6 de maio, reguladora do control xudicial previo do Centro Nacional de Intelixencia.

2. Sen prexuízo da protección das súas actividades, a actuación do Centro Nacional de Intelixencia será sometida a control parlamentario e xudicial nos termos que esta lei e a Lei orgánica reguladora do control xudicial previo do Centro Nacional de Intelixencia determinan.

3. No desenvolvemento das súas funcións, o Centro Nacional de Intelixencia actuará baixo os principios de eficacia, especialización e coordinación, de acordo cos obxectivos de intelixencia definidos polo Goberno.

#### Artigo 3. *Programación de obxectivos.*

O Goberno determinará e aprobará anualmente os obxectivos do Centro Nacional de Intelixencia mediante a Directiva de intelixencia, que terá carácter secreto.

#### Artigo 4. *Funcións do Centro Nacional de Intelixencia.*

Para o cumprimento dos seus obxectivos, o Centro Nacional de Intelixencia levará a cabo as seguintes funcións:

a) Obter, avaliar e interpretar información e difundila intelixencia necesaria para protexer e promover os intereses políticos, económicos, industriais, comerciais e estratéxicos de España, podendo actuar dentro ou fóra do territorio nacional.

b) Prever, detectar e posibilita-la neutralización daquelas actividades de servicios estranxeiros, grupos ou persoas que poñan en risco, ameacen ou atenten contra o ordenamento constitucional, os dereitos e liberdades dos cidadáns españois, a soberanía, integridade e seguridade do Estado, a estabilidade das súas institucións, os intereses económicos nacionais e o benestar da poboación.

c) Promove-las relacións de cooperación e colaboración con servicios de intelixencia doutros países ou de organismos internacionais, para o mellor cumprimento dos seus obxectivos.

d) Obter, avaliar e interpreta-lo tráfico de sinais de carácter estratéxico, para o cumprimento dos obxectivos de intelixencia sinalados ó centro.

e) Coordina-la acción dos diferentes organismos da Administración que utilicen medios ou procedementos de cifra, garanti-la seguridade das tecnoloxías da información nese ámbito, informar sobre a adquisición coordinada de material criptolóxico e forma-lo persoal, propio ou doutros servicios da Administración, especialista nes-

te campo para asegura-lo adecuado cumprimento das misións do centro.

f) Velar polo cumprimento da normativa relativa á protección da información clasificada.

g) Garanti-la seguridade e protección das súas propias instalacións, información e medios materiais e persoais.

#### Artigo 5. *Actividades do Centro Nacional de Intelixencia.*

1. As actividades do Centro Nacional de Intelixencia, así como a súa organización e estrutura interna, medios e procedementos, persoal, instalacións, bases e centros de datos, fontes de información e as informacións ou datos que poidan conducir ó coñecemento das anteriores materias, constitúen información clasificada, co grao de segredo, de acordo co disposto na lexislación reguladora dos segredos oficiais e nos acordos internacionais ou, se é o caso, co maior nivel de clasificación que se recolla na dita lexislación e nos mencionados acordos.

2. O Centro Nacional de Intelixencia manterá co resto das Administracións públicas, cando proceda, as relacións de cooperación e coordinación necesarias para o mellor cumprimento das súas misións, de acordo coa lexislación vixente en cada caso e preservando a protección legal das actividades do centro.

3. O Centro Nacional de Intelixencia poderá dispor e usar de medios e actividades baixo cobertura, e poderá solicitar das autoridades legalmente encargadas da súa expedición as identidades, matrículas e permisos reservados que resulten precisos e adecuados ás necesidades das súas misións.

Así mesmo, os seus membros disporán de documentación que os acredite, en caso de necesidade, como membros do centro, sen que iso exonere a persoa ou entidade ante a que se produza a acreditación da obriga de gardar segredo sobre a identidade do dito persoal. As autoridades competentes ante as que comparezan membros do Centro Nacional de Intelixencia, por motivos relacionados con actividades do servizo, adoptarán as medidas necesarias para asegura-la protección dos datos persoais, identidade e aparencia daqueles.

Tamén disporán de licenza de armas, en función das necesidades do servizo, de acordo coa normativa vixente.

4. Os membros do Centro Nacional de Intelixencia non terán a consideración de axentes da autoridade, con excepción daqueles que desempeñen cometidos profesionais relacionados coa protección do persoal do centro e das súas instalacións.

5. Para o cumprimento das súas funcións, o Centro Nacional de Intelixencia poderá levar a cabo investigacións de seguridade sobre persoas ou entidades na forma prevista nesta lei e na Lei orgánica reguladora do control xudicial previo do Centro Nacional de Intelixencia. Para a realización destas investigacións poderá solicitar de organismos e institucións públicas e privadas a colaboración precisa.

## CAPÍTULO II

### Da organización e réxime xurídico

#### Artigo 6. *Comisión Delegada do Goberno para Asuntos de Intelixencia.*

1. A Comisión Delegada do Goberno para Asuntos de Intelixencia velará pola adecuada coordinación de

tódolos servizos de información e intelixencia do Estado para a formación dunha comunidade de intelixencia.

2. A comisión estará presidida polo vicepresidente do Goberno que designe o seu presidente e integrada polos ministros de Asuntos Exteriores, Defensa, Interior e Economía, así como polo secretario xeral da Presidencia, o secretario de Estado de Seguridade e o secretario de Estado director do Centro Nacional de Intelixencia, que actuará como secretario.

3. Non obstante o disposto no punto anterior, poderán ser convocados ás reunións da comisión os titulares daqueles outros órganos superiores e directivos da Administración xeral do Estado que se considere conveniente.

4. Correspóndelle á Comisión Delegada:

a) Proporlle ó presidente do Goberno os obxectivos anuais do Centro Nacional de Intelixencia que terán que integra-la Directiva de intelixencia.

b) Realiza-lo seguimento e avaliación do desenvolvemento dos obxectivos do Centro Nacional de Intelixencia.

c) Velar pola coordinación do Centro Nacional de Intelixencia, dos servizos de información dos corpos e forzas de seguridade do Estado e os órganos da Administración civil e militar.

#### Artigo 7. *Organización.*

1. O Centro Nacional de Intelixencia adscríbese organicamente ó Ministerio de Defensa.

2. A súa organización, réxime económico-orzamentario e de persoal desenvolverase en réxime de autonomía funcional baixo a figura de organismo público con personalidade xurídica propia e plena capacidade de obrar.

3. O Centro Nacional de Intelixencia estrutúrase nunha dirección, o titular da cal terá rango de secretario de Estado, unha Secretaría Xeral e nas unidades que se determinen regulamentariamente.

#### Artigo 8. *Réxime xurídico.*

1. O persoal que preste servizos no Centro Nacional de Intelixencia, calquera que sexa a súa procedencia, estará sometido a un mesmo e único estatuto de persoal que será aprobado polo Goberno e no que, de acordo coas funcións e natureza propias do centro, se regularán, polo menos, os seguintes extremos:

a) O proceso de selección do persoal, que esixirá a superación de probas obxectivas de acordo cos principios de mérito e capacidade.

b) O carácter temporal ou permanente da relación de servizos co Centro Nacional de Intelixencia.

c) A estrutura xerárquica do Centro Nacional de Intelixencia e as relacións orgánicas e funcionais seguintes.

d) As medidas administrativas que garantan a reserva sobre os aspectos de xestión de persoal que afecten o funcionamento do centro.

Non obstante o anterior, o centro poderá contratar outro persoal con carácter laboral para atende-las súas necesidades de mantemento e funcionamento non vinculadas co exercicio efectivo das funcións que esta lei lle encomende. Este persoal poderá ser sometido ás medidas de seguridade e control que se coiden necesarias das que se prevegan con carácter xeral no estatuto do persoal do centro.

2. O Centro Nacional de Intelixencia elaborará anualmente un anteproxecto de orzamento e elevarallo ó

ministro de Defensa para remisión ó Consello de Ministros, que o integrará nos Orzamentos Xerais do Estado para a súa posterior remisión ás Cortes Xerais.

3. O control da xestión económico-financeira efectuarase de conformidade co disposto na Lei xeral orzamentaria para os organismos públicos previstos na disposición adicional décima da Lei 6/1997, do 14 de abril, de organización e funcionamento da Administración xeral do Estado. O Goberno establecerá as peculiaridades necesarias que garantan a súa autonomía e independencia funcional.

4. No seu réxime patrimonial e de contratación poderá someterse ó dereito privado.

#### Artigo 9. *Secretario de Estado director do Centro Nacional de Intelixencia.*

1. O secretario de Estado director do Centro Nacional de Intelixencia será nomeado por real decreto por proposta do ministro de Defensa. O mandato será de cinco anos, sen prexuízo da facultade do Consello de Ministros de proceder á súa substitución en calquera momento.

2. Correspóndelle ó secretario de Estado director do Centro Nacional de Intelixencia impulsar a actuación do centro e coordina-las súas unidades para a consecución dos obxectivos de intelixencia fixados polo Goberno, asegura-la adecuación das actividades do centro ós ditos obxectivos e exerce-la representación daquel. Así mesmo, correspóndelle:

a) Elabora-la proposta de estrutura orgánica do Centro Nacional de Intelixencia e nomear e separa-los titulares dos seus órganos directivos.

b) Aproba-lo anteproxecto de orzamento.

c) Mante-los procedementos de relación necesarios para o desenvolvemento das actividades específicas do Centro Nacional de Intelixencia, así como a celebración dos contratos e convenios con entidades públicas ou privadas que sexan precisos para o cumprimento dos seus fins.

d) Manter e desenvolver, dentro do ámbito da súa competencia, a colaboración cos servicios de información das forzas e corpos de seguridade do Estado, e os órganos da Administración civil e militar, relevantes para os obxectivos de intelixencia.

e) Exerce-las facultades que outorgue a lexislación vixente ós presidentes e directores de organismos públicos e as que lles atribúan as disposicións de desenvolvemento.

f) Desempeña-las funcións de Autoridade Nacional de Intelixencia e Contraintelixencia e a dirección do Centro Criptolóxico Nacional.

g) Realizar cantas outras funcións lle sexan atribuídas legal ou regulamentariamente.

#### Artigo 10. *Secretario xeral do Centro Nacional de Intelixencia.*

1. O secretario xeral do Centro Nacional de Intelixencia, con rango de subsecretario, será nomeado por real decreto por proposta do ministro de Defensa, entre persoas de recoñecida experiencia e competencia profesional no ámbito da intelixencia. Substituirá o director nos casos de ausencia, vacante ou enfermidade.

2. O secretario xeral do Centro Nacional de Intelixencia exercerá as funcións que lle outorgue o real decreto de estrutura do centro, e, en particular, as seguintes:

a) Apoiar e asistilo director do Centro Nacional de Intelixencia no exercicio das súas funcións.

b) Establece-los mecanismos e sistemas de organización do centro e determina-las actuacións precisas para a súa actualización e mellora.

c) Dirixi-lo funcionamento dos servicios comúns do centro a través das correspondentes instrucións e ordes de servicio.

d) Desempeña-la xefatura superior do persoal do centro, elabora-la proposta de relación de postos de traballo e determina-los postos vacantes que hai que prover durante cada exercicio.

e) As demais que legal ou regulamentariamente se lle encomenden.

### CAPÍTULO III

#### Do control

#### Artigo 11. *Control parlamentario.*

1. O Centro Nacional de Intelixencia someterá ó coñecemento do Congreso dos Deputados, na forma prevista polo seu regulamento, a través da comisión que controla os créditos destinados a gastos reservados, presidida polo presidente da cámara, a información apropiada sobre o seu funcionamento e actividades. O contido das ditas sesións e as súas deliberacións serán secretos.

2. A citada comisión do Congreso dos Deputados terá acceso ó coñecemento das materias clasificadas, con excepción das relativas ás fontes e medios do Centro Nacional de Intelixencia e a aquelas que procedan de servicios estranxeiros ou organizacións internacionais nos termos establecidos nos correspondentes acordos e convenios de intercambio da información clasificada.

3. Os membros da comisión correspondente estarán obrigados, nos termos do Regulamento do Congreso dos Deputados, a gardar segredo sobre as informacións e documentos que reciban. Unha vez examinados os documentos, serán reintegrados ó Centro Nacional de Intelixencia para a súa debida custodia, sen que se poidan reter orixinais, copias ou reproducións.

4. A comisión a que se refire este artigo coñecerá dos obxectivos de intelixencia establecidos anualmente polo Goberno e do informe que, tamén con carácter anual, elaborará o director do Centro Nacional de Intelixencia de avaliación de actividades, situación e grao de cumprimento dos obxectivos sinalados para o período anterior.

#### Artigo 12. *Control xudicial previo.*

O control xudicial previo do Centro Nacional de Intelixencia levarase a cabo na forma prevista na Lei orgánica reguladora do control xudicial previo do Centro Nacional de Intelixencia, complementaria desta lei.

#### Disposición adicional primeira. *Natureza xurídica.*

O Centro Nacional de Intelixencia queda incluído dentro dos organismos públicos a que se refire a disposición adicional décima da Lei 6/1997, do 14 de abril, de organización e funcionamento da Administración xeral do Estado.

#### Disposición adicional segunda. *Supresión do Centro Superior de Información da Defensa.*

1. Queda suprimido o Centro Superior de Información da Defensa.

2. O Centro Nacional de Intelixencia sucederá ó Centro Superior de Información da Defensa no exercicio das súas funcións e cometidos, e quedará subrogado na titularidade dos bens, dereitos e obrigas do Estado afectos ou constituídos en virtude das mencionadas funcións e do seu fondo documental.

3. Tódalas referencias que conteñan as disposicións normativas vixentes ó Centro Superior de Información da Defensa entenderanse feitas ó Centro Nacional de Intelixencia.

Disposición adicional terceira. *Habilitación de adscrición orgánica.*

Autorízase o presidente do Goberno para modificar, por real decreto, a adscrición orgánica do Centro Nacional de Intelixencia, prevista no artigo 7.1 desta lei. O departamento ó que se adscriba o centro exercerá as competencias que, en relación con el, atribúe esta lei ó Ministerio de Defensa e ó seu titular.

Disposición transitoria única. *Garantía de dereitos adquiridos.*

1. O persoal que, no momento de entrada en vigor desta lei, teña a consideración de persoal estatutario permanente ou temporal do Centro Superior de Información da Defensa, quedará integrado na mesma condición no Centro Nacional de Intelixencia.

2. Mentres non se produza o desenvolvemento regulamentario desta lei e se aprobe un estatuto de persoal do Centro Nacional de Intelixencia, continuará en vigor o Real decreto 1324/1995, do 28 de xullo, polo que se establece o estatuto de persoal do Centro Superior de Información da Defensa.

3. O grupo de clasificación, grao persoal e demais dereitos económicos que o persoal do Centro Superior de Información da Defensa tivese recoñecidos, quedarán plenamente garantidos no novo réxime de persoal.

Disposición derogatoria única.

Quedan derogadas cantas disposicións de igual ou inferior rango se opan ó disposto nesta lei.

Disposición derradeira primeira. *Facultade de desenvolvemento.*

Facúltase o Consello de Ministros para dictar cantas disposicións sexan necesarias para a aplicación e desenvolvemento desta lei.

Disposición derradeira segunda. *Modificacións orzamentarias.*

O Ministerio de Facenda realizará as modificacións orzamentarias oportunas para dar cumprimento ó disposto nesta lei.

Disposición derradeira terceira. *Entrada en vigor.*

Esta lei entrará en vigor o mesmo día da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumpran e fagan cumprir esta lei.

Madrid, 6 de maio 2002.

JUAN CARLOS R.

O presidente do Goberno,

JOSÉ MARÍA AZNAR LÓPEZ

## MINISTERIO DE FOMENTO

**8737** *REAL DECRETO 366/2002, do 19 de abril, polo que se modifica parcialmente o Regulamento da Lei de ordenación dos transportes terrestres.* («BOE» 110, do 8-5-2002.)

O Regulamento da Lei de ordenación dos transportes terrestres, aprobado polo Real decreto 1211/1990, do 28 de setembro, establece nos seus artigos 28 e 29 o réxime tarifario aplicable ás distintas actividades de transporte.

O punto 8 do artigo 28 faculta o ministro de Fomento para determinar, en relación cos distintos modos e clases de transporte terrestre e para as actividades auxiliares e complementarias deles, tarifas de referencia.

Non obstante, o recente proceso de liberalización da economía en xeral e do sector do transporte en particular, fan aconsellable a supresión do actual sistema de tarifas de referencia, máxime despois da posta en marcha do Observatorio de Custos do Transporte de Mercadorías por Estrada, nacido como froito do consenso entre o Comité Nacional do Transporte por Estrada e as principais asociacións representativas das empresas cargadoras, e que ten como finalidade proporcionar elementos de xuízo fiables a partir dos cales as partes contratantes poidan acordar libremente o prezo que estimen máis conveniente, coa certeza de o facer sobre bases razoablemente contrastadas.

Na súa virtude, por proposta do ministro de Fomento, de acordo co Consello de Estado e logo de deliberación do Consello de Ministros na súa reunión do día 19 de abril de 2002,

DISPONGO:

**Artigo único.** *Modificación do Regulamento da Lei de ordenación dos transportes terrestres.*

Un. Modifícase o punto 8 do artigo 28 do Regulamento da Lei de ordenación dos transportes terrestres, aprobado polo Real decreto 1211/1990, do 28 de setembro, na súa redacción dada polo Real decreto 1136/1997, do 11 de xullo, que queda redactado da seguinte maneira:

«Artigo 28.

8. As tarifas obrigatorias deberán estar expostas ó público de conformidade co previsto neste regulamento e co que o ministro de Fomento determine. Este ministro poderá estender esta obrigatoriedade ós prezos que apliquen as empresas, aínda que non existan en relación con elas tarifas administrativas.»

Dous. Modifícanse os puntos 2 e 4 do artigo 29 do Regulamento da Lei de ordenación dos transportes terrestres, aprobado polo Real decreto 1211/1990, do 28 de setembro, que quedan redactados da seguinte maneira:

«Artigo 29.

2. No procedemento de determinación e modificación das tarifas obrigatorias, cando estas afecten globalmente a unha clase de transporte, deberán solicitarse os informes do Consello Nacional do Transporte Terrestre e, agás que se trate de tarifas de transportes ferroviarios, do Comité Nacional do Transporte por Estrada. Tales informes deberán emitirse nun prazo máximo de quince días.»